

दिनांक : 17.02.2026

समय : 18.45 बजे

- केन्द्रीय कृषि मंत्री शिवराज सिंह चौहान कह्यो-किसानां री माली बरकत सारु वां ने नुवी तकनीक ऊं जोड़बा री जरूरत ।
- केन्द्रीय सहकारिता मंत्री अमित शाह गुजरात मांय राज्यां रा सहकारिता मंत्रियां री मीटिंग रो उद्घाटन कीनो ।
- ए.सी.बी. जल जीवन मिशन भ्रष्टाचार मामला मांय नौ अहलकारां ने गिरफ्तार कीना ।
- प्रदेश रा केई हलकां मांय काल बिरखा व्हेवण अर ओळा पड़बा रा आसार ।

000

केन्द्रीय कृषि अर किसान कल्याण मंत्री शिवराज सिंह चौहान कह्यो है के किसानां ने मजबूत अर माली तौर ऊं ताकतवर बणावण सारु वां ने नुवी तकनीक ऊं जोड़णो जरूरी है। श्री चौहान आज जयपुर मांय किसानां रा डिजिटल साथी 'भारत विस्तार' रा उद्घाटन कार्यक्रम मांय बोल रह्या हा। ई पहल रो मकसद किसानां ने होशियार, मजबूत अर जाणकारी राखण वाळा बणावणो है। श्री चौहान कह्यो के केंद्र सरकार किसानां री उपज बधावण, खर्चो कम करण, किसानां ने व्हेवण वाळा नुकसान री भरपाई करण सागे इंटीग्रेटेड फार्मिंग ने बधावो देवण माथे ज़ोर दे रही है। कृषि मंत्री कह्यो के खेती सागे पशुपालन, मुर्गीपालन, मछलीपालन ने ई जोड़णो घणो जरूरी है। भारत विस्तार रो जिक्र करता थकां श्री चौहान कह्यो के सरकार री न्यारी-न्यारी योजनावां अर तकनीकां री जाणकारी नी व्हेवण ऊं काश्तकारां ने घणो नुकसान झेलणो पड़तो हो। मंत्री कह्यो के अब 'भारत विस्तार' ऐडो जरियो है जिण ऊं किसान फसल आधारित वैज्ञानिक राय, मण्डी भाव अर मौसम री जाणकारी समेत भांत-भांत री जाणकारियां ले सके है। कृषि मंत्री कह्यो के इण ऊं मोबाइल फोन रे जरिये एक ही कॉल माथे हर भांत री जाणकारी मिल सकेला। कृषि मंत्री कह्यो के भारत-अमरीका बीचे व्ह्या कारोबारी करार मांय किसानां रा भला रो पूरो ध्यान राख्यी ज्यो है। वे विपख माथे गुमराह करण रो आरोप माडता थकां कह्यो के मौजूदा केंद्र सरकार हमेशा किसानां रा भला माथे खास ध्यान दीनो है। श्री चौहान कह्यो के यूपीए सरकार स्वामीनाथन समिति री रपट मानबा ऊं नट ग्यी ही पण साल 2019 मांय मोदी राज मांय इण ने लागू करी ज्यी।

कार्यक्रम मांय मौजूद मुख्यमंत्री भजन लाल शर्मा कह्यो के विकसित भारत बणावण सारु किसानां ने विकसित करणो घणो जरूरी है। श्री शर्मा किसानां ऊं खर्चो कम करण अर उपज मांय बधोतरी सारु तकनीक काम ले र जरूरत रे मुताबिक खाद-पाणी काम लेवण बाबत् कह्यो।

कार्यक्रम मांय केन्द्रीय कृषि राज्य मंत्री भागीरथ चौधरी, राज्य रा कृषि मंत्री किरोड़ी लाल मीणा अर कृषि विभाग रा अहलकार ई मौजूद हा। ई सागे ई आखा देश रा किसान ई वीडियो कॉन्फ्रेंस रे मार्फत इण ऊं जुड़्या।

000

केन्द्रीय गृह अर सहकारिता मंत्री अमित शाह आज गुजरात मांय गांधीनगर रा महात्मा मिन्दर मांय राज्यां अर केन्द्र रा राज वाळा प्रदेशां रा सहकारिता मंत्रियां री बैठक रो उद्घाटन किनो। ई मौके श्री शाह अनाज भेळो करण री दुनिया मांय सब ऊं मोटी योजना अर दो लाख नुवी बहुउद्देशीय प्राथमिक कृषि ऋण समितियां बणावण रा कामकाज रो जायजो लीनो। वे सोशल मीडिया पोस्ट रे जरिये बतायो के नुवी सहकारी नीति अर त्रिभुवन सहकारी विश्वविद्यालय रे मार्फत सहकारी हलका ने और मजबूत बणायो जा रह्यो है।

000

केन्द्रीय सूचना अरु प्रसारण मंत्री अश्विनी वैष्णव कह्यो है के एआई पांचवीं औद्योगिक क्रांति है। वे नई दिल्ली मांय चाल रह्या इंडिया एआई इम्पैक्ट समिट रा दूजा दिन आज खबरनवीसां सागे बातचीत कर रह्या हा। श्री वैष्णव कह्यो के ओ शिखर सम्मेलन आबादी ऊँ जुड़ी समस्यावां हलकरण रो मंच मुहैया करा रह्यो है। केन्द्रीय मंत्री कह्यो के ई शिखर सम्मेलन पाछे आवता दो साल मांय 200 अरब डॉलर ऊँ बत्ता निवेश री आस है।

समिट रा एक और सत्र मांय केन्द्रीय शिक्षा मंत्री धर्मेंद्र प्रधान कह्यो के एआई अर भणार्ई—लिखार्ई एक—दूजा रा मददगार है। श्री प्रधान कह्यो के मौजूदा दौर मांय देश ज्ञान केंद्रित समाज बणबा ओड़ी बढ रह्यो है।

000

भ्रष्टाचार निरोधक ब्यूरो—एसीबी री विशेष जांच टीम जल जीवन मिशन मांय व्ह्या कथित भ्रष्टाचार रा मामला मांय आज नौ अहलकारां ने गिरफ्तार कर लीना। ब्यूरो री टीमां जयपुर, बाड़मेर, उदयपुर, करौली अर दिल्ली समेत न्यारी—न्यारी ठौड़ां एके सागे छापा मार्या। गिरफ्तार करी ज्या अहलकारां मांय मौजूदा चीफ इंजीनियर दिनेश गोयल, के.डी. गुप्ता अर निरिल कुमार शामिल है। ई सागे ई एडिशनल चीफ इंजीनियर सुभांशु दीक्षित, वित्तीय सलाहकार सुशील शर्मा अर मुअत्तल चाल रह्या एक्स. ईएन. विशाल सक्सेना ने ई पकड़ी ज्या है। पकड़ी ज्या रिटायर्ड अहलकारां मांय एडिशनल चीफ इंजीनियर अरुण श्रीवास्तव, तकनीकी सदस्य डी.के. गौड़ अर एस.ई. महेंद्र प्रकाश सोनी ई शामिल है। ब्यूरो कानी ऊँ हाल तांई करी ज्या जांच रे मुजब कंपनियां चलावण वाळां कानी ऊँ जाली सर्टिफिकेट तैयार करायी ज्या हा, ज्यां रा आधार ऊँ जन स्वास्थ्य अभियांत्रिकी विभाग रा अहलकारां री मिलीभगत रे जरिये नौ सौ साठ करोड़ रुप्या रा काम रा टेंडर हासिल करी ज्या। जांच रे मुजब अहलकारां कानी ऊँ पचास करोड़ रुप्या ऊँ बत्ता मोल री परियोजनावां ऊँ जुड़्या टेंडर री शर्तां मांय ई बदलाव करी ज्यो हो। ई पाछे टेंडर पूलिंग रे जरिये तैय ऊँ बत्ती रेट माथे टेंडर मंजूर करी ज्या। गिरफ्तार करी ज्या आरोपितां ऊँ पूछ ताछ करी जा रही है। ई बारा मांय गृह राज्य मंत्री जवाहर सिंह बेदम कह्यो के प्रदेश री मौजूदा सरकार ई मामला मांय हर पहलू री जांच कर रही है।

000

राजस्थान पुलिस रो स्पेशल ऑपरेशन्स ग्रुप—एसओजी वरिष्ठ अध्यापक भर्ती परीक्षा—2022 मांय फर्जी उम्मीदवार रा तौर ऊँ इम्तिहान मांय बैठण वाळा पांच इनामी आरोपितां ने गिरफ्तार कीना है। एसओजी अंडमान, कोलकाता, जयपुर अर कोटा समेत 6 ठौड़ां एके सागे आ कार्रवाई कीनी। पकड़ी ज्या आरोपितां मांय डॉक्टरी री पढ़ाई कर रह्या तीन विद्यार्थी अर दो सरकारी अध्यापक शामिल है, ज्यां माथे दस—दस हजार रुप्या रो ईनाम हो। ई मामला मांय हाल तांई 12 उम्मीदवारां अर नौ फर्जी उम्मीदवारां समेत 26 जणां पकड़्या जा चुक्या है।

000

विधानसभा मांय व्ह्या भारी हंगामा बीचे सदन री कार्यवाही आज केई दफा टाळणी पड़ी। विधायक बालमुकुन्दाचार्य सदन मांय गाय ने राज्य माता रो दर्जा देवण ऊँ जुड़्यो सवाल पूछ्यो। जवाब मांय गौपालन मंत्री जोराराम कुमावत बतायो के फिलहाल ऐडा किण ई प्रस्ताव माथे विचार नी कर्यो जा रह्यो है। सिंज्या विधानसभा री कार्यवाही ओजू सरू व्ही। आखिरी समाचार मिलण तांई वित्त मंत्री दिया कुमारी बजट माथे चर्चा रो जवाब दे रही ही।

000

प्रदेश मांय नुवा पश्चिमी विक्षोभ रा असर ऊँ काल केई हलकां मांय बादळा री गाज सागे बिरखा व्हेवण अर ओळा पड़बा रा आसार है। मौसम केंद्र जयपुर रे मुजब अजमेर, बीकानेर, भरतपुर, जयपुर अर कोटा संभाग समेत शेखावाटी हलका मांय छांटा-छिड़का रा आसार है। महकमो 30 ऊँ 40 किलोमीटर प्रति घंटा री रपतार ऊँ बायरो बाजण सारू चेतायो है। इण रा असर ऊँ आवता दो-तीन दिन पारो 2 ऊँ 4 डिग्री सेल्सियस ताई उतर सके है। ई बीच, आज पाली ज़िला रा देसूरी, घाणेराव अर बाली मांय आज छांटो-छिड़को व्हयो। बारां ज़िला मांय संवारे ऊँ ई बादळा मण्ड गया अर आखा दिन सीळो बायरो बाजतो रह्यो। खेती-बाड़ी रा जाणकारां रे मुजब मौजूदा मौसम अर हल्को तावड़ो गेहूं, चणा अर तरकारियां री साखां सारू घणो फायदेमंद है।

000

स्वच्छ भारत मिशन शहरी रा ब्रांड एंबेसडर के.के. गुप्ता आज भरतपुर मांय अहलकारां री मीटिंग ले र शहर ने साफ अर रूपाळो बणावण रा गुर बताया। श्री गुप्ता साफ-सफाई सारू 365 दिन री कार्य योजना बणावण बाबत् कह्यो। वे प्रदेश मांय निवेश सारू करी ज्या करार अर वां जुड़्या कामां रो ई जिक कीनो।

000

बालोतरा ज़िला मांय “प्लास्टिक कचरा मुक्त अभियान” रा तैत आज स्कूल कॉलेजां मांय खास कार्यक्रम राख्यी ज्या। स्वच्छ भारत मिशन ग्रामीण रा तैत राज्य मांय 28 फरवरी ताई चालण वाळा ई अभियान रो मकसद गांवांई हलकां मांय प्लास्टिक काम लेवणो बंद करणो है। ई दौरान विद्यार्थी अर शिक्षक श्रम दान कर र प्लास्टिक कचरो भेळो कीनो अर पर्यावरण री हिफाजत री शपथ ली। स्कूलां मांय “प्लास्टिक बैंक” ई बणायी ज्या है।

000

टी-20 विश्वकप क्रिकेट मांय ऑस्ट्रेलिया होड़ ऊँ बाहर व्हे गयो है। आज खराब मौसम रे कारण जिम्बाब्वे अर आयरलैण्ड बीचे मुकाबलो रद्द व्हे जावण ऊं जिम्बाब्वे री टीम रे 5 अंक व्हे गया अर वा पूल मांय दूजा नंबर माथे रह र सुपर 8 दौर मांय पूग गयी जद के ऑस्ट्रेलिया रे 2 अंक ई रह गया अर वा पूल मांय चौथा नंबर माथे रह र होड़ ऊं बाहर व्हे गयी। आज रा एक और मुकाबला मांय न्यूजीलैण्ड कनाडा ने 8 विकेट ऊँ करारी शिकस्त दीनी। आज रा तीजा मुकाबला मांय अब ऊँ थोड़ी देर पछे स्कॉटलैण्ड अर नेपाल री टीमामी-सामी व्हेला।

000